

# Kaarata yowambeela yoolebiwa ni Peduru

## Madhu oovolwana

Murumiwi Peduru aalebele kaarata ela aKirixtu, eneeriwa “oosakuliwa a Mulugu”, ale yabalaleyele mirudda mitanu dha oRoma. Peduru akala “oBabi-looniya” (5.13), moorumeedheya bu mukalelo woowoga wi nluwa na oRoma (moone Ovuhulela 14.8; 16.19; 17.5). Kaarata ela yalebiwe muwari mwa yaaka ya 60 ofiyedha 67 Kirixtu agabaliwe.

Anameelenga yowoona goyi ni oharahariwa mwaha wa nrromelo. Peduru ahisayela waalibiha wi elibihedhegeve, omuhara Yesu Kirixtu. Murumiwi aasuuziha wi goyi enooniha wi nrromelo neewa tha ebaribari (1.7). Onowaakomeza wi vadhulu va dhaatedhene, aliwa ekale mwiigumini enadhana nriho ni nthithimiho ndina na Mulugu (1.15-16). Vano Peduru onowelega wawuubusedha aKirixtu wi ebaribari nihisakuliwa “wi nlaleyege opogo wa ole wuwiithanileni mwiipipini wi mukale mowaara mwaaye mootikiniha” (2.9).

Peduru afuna waalibiha mirima dheewa mwaha wi aliwa yoorabulihiwa teto yooharahariwa mwaha woomurumela Kirixtu.

## Ogawanyeya wa kaarata

Madhu oolajela *1.1-2*.

Ojejihedha wooliba vaari va dhooweehiwa *1.3-12*.

Owaraalihiwa mwa egumi yoweela *1.13 ofiyedha 2.10*.

Mweeddelo wa aKirixtu *2.11 ofiyedha 4.19*.

Olagiwa wa asogoleli ni wa azombwe *5.1-11*.

Malojelo oogomihedha *5.12-14*.

### Madhu oolojela

**1** <sup>1</sup>Wa oosakuliwa a Mulugu anaweendda ebalaleyele dhilabo nda: OPonto, oGalasiya, oKapadosiya, oAziya ni oBitiniya.<sup>a</sup> Di miyo Peduru, murumiwi a Yesu Kirixtu.

<sup>2</sup>Nyo muhusakuliwa wona mwasasanyedhele Mulugu Baba. Nda dhiireyile mwa mabasa a Muneba yuweeliheni. Mulugu ohuusakulani ndala wi mmwiiwelelege Yesu Kirixtu, mweelihiwe ni mwazi waaye.

Mahala ni murenddele wa Mulugu dheenjehedhiwe wa nyo.

#### Omutamaala Mulugu ni ejehedho yooliba vaari va dhoowehiwa

<sup>3</sup>Athithimihiwe Mulugu, baabi a Nabwiya eehu Yesu Kirixtu! Ni mwaha woneeddiwela thagaraga dhijinji, oliye ohunibala dila biili wi nikalena ejehedho yooliba, odheela ovenyihiwa wa Yesu Kirixtu muukwani, <sup>4</sup>nnoodha naakele mareliho eroromelihiwiihu ehinavudda, ehinatakaliheya, ehinadduwa. Mulugu onowaaloglelave mareliho ala wa nyo odhulu. <sup>5</sup>Ni owodha wa Mulugu, odheela nrromelo neenyu, nyo munologoleliwawe ofiyedha odha ovulumusiwa. Ovulumusiwa wula osasanyedhiwe wi wooneyihiwe omakuthulo wa mudhidhi. <sup>6</sup>Mwa ndo muhagalale, naari mwa mudhidhi vang'ono muukuuliwaga ni weehiwa woohiyana-hiyana. <sup>7</sup>Dhoorusa ndo dhinoweeha nrromelo ninniinyuna. Vowi naari oro onanoongeya, onoweehiwa ni munddo. Mwa mukalelo mmohive nrromelo ninniinyuna, nnakwaranya oro, nneere weehiwa. Nakalave nooliba nnodhiha otamaala, oriiha ni othithimiha, Yesu Kirixtu aawelaga. <sup>8</sup>Naari nyo muhmoonileve, munomudhivela; naari muhmoonileve dhiinova, munomuroromelave vano thabani ni ohagalala woothithimiheya, ohagalala woohuwogeya. <sup>9</sup>Mowindo munowaakelala dhooharela dha nrromelo neenyu oli ovulumusiwa wa dhigumi dheenyu.

<sup>10</sup>Bu mwaha wa ovulumusa wula anamavuhulela wakohiliisu esayelaga ononesesa pama, aliwa yahivuwaha mutheenga onawoga dha mahala a Mulugu eeriye oovaheni. <sup>11</sup>Yahisayela onona mudhidhi baani, waapadduwiiwa ovulumusiwa wula, mooligana ni Muneba wa Kirixtu waali mwa aliwa wavuhulela dha masooso yaamudheele Kirixtu, ni nthithimiho nneeriye aakele omamalelo wa masooso ayo. <sup>12</sup>Anamavuhulela egawogile dha mutheenga olalelyiwiinyu dhiinova, Mulugu ahawooniha wi dhavuhuleliwiisu kadhaali dheewa, mbwenye dhaali dha opama weenyu. Anamalaleya Muselu Wapama, yawogile mwa kopolo dha Muneba Woweela, warumihiwe odhulu, yahuulaleyelani mutheenga ola. Angero enorabilela ononelamo dhego dhedhi.

<sup>a</sup> 1.1 Muselu Wapama wahimwadheyela dhilabo dhoolapela ni wEzarayeli wona oPonto, oGalasiya, oKapadosiya, oAziya ni oBitiniya. Moone Meerelo a Arumiwi 2.9-10; 16.6.

## Owaraalihiwa mwa egumi yoweela

<sup>13</sup>Mowindo, mukale owiisasanyedheene mmirimani mweenyu wi mwiiregena, mururumuwe, muhele ejijhedho yeenyu yaatene mwa mahala enavahiwiinyu ni Yesu Kirixtu vineyooneyihigiiye. <sup>14</sup>Wona ahima owiwelela, kamwihiye dhigumi dheenyu ojiwa ni dhikwaminigwa dhanniinyuna mugali moohunonelamo. <sup>15</sup>Moohiyaniha, kalani oweela mirima mwa mukalelo waatene onakaliinyu wona ole wuwiithanileni oli oweela murima, mukale oweela mirima. <sup>16</sup>Vowi Maleba Ootaleleya enowoga, yiiraga: *“Kalani oweela mirima mwaha wi miyo gili oweela murima”*.<sup>b</sup>

<sup>17</sup>Akala munomwiithana Mulugu, onaathonga athu moohusakula mooligana ni mabasa eewa, Baba eenyu, nyo mweeddege mmurihaga Mulugu mukalege wona athu eli aleddo. <sup>18</sup>Nyo muhunona pama mutheengo oliviwe vowooboliwa mwa mikalelo dheenyu dheebeweene dhavahiwiinyu ni makolo eenyu. Mutheengoya kahuwo wa dhego dhinavudda wona oro, naari parata, <sup>19</sup>mbwenye mooboliwe ni mwazi woofuneyesesa wa Kirixtu, aali wona nibila noohukanna thobathoba naari yoo haleela eli yaatene. <sup>20</sup>Oliye asakuliwe ni Mulugu elabo ehinapaddusiwe, vano mudhidhi wookuthula ola ohumooneyiha mwaha wa opama weenyu. <sup>21</sup>Odheela mwa oliye munomuroromela Mulugu, vovenyihiwa muukwani ohuvahiwa nthithimiho, mowindo nrromelo ni ejijhedho yeenyu dhili mwa Mulugu.

<sup>22</sup>Nyo mwihyeeliha odheela mowiiwelela weenyu ebaribari, mudhivelanenge mwa ebaribari wona emudhi, mmohi ni mukwaaye ni kopolo dhaatedhene ni murima woweela. <sup>23</sup>Nyo odheela mwa madhu eegumi a Mulugu, muhubaliwa dila biili. Ndo kadhiireyile ni bewu yoomala, mbwenye mwa bewu egumi<sup>c</sup> yamukala-kala. <sup>24</sup>Wona Maleba Ootaleleya enawoga, yiiraga:

*“Athu aatene eli wona todo dha mukokolani,  
nthithimiho neewa nili wona todo,  
tododha dhoomma, dhinovaareya;*

<sup>25</sup> *mbwenye madhu a Nabwiya ba mukala-kala”*.<sup>d</sup>

Ala bi madhu a Muselu Wapama elalelyeliwiinyu.

**2** <sup>1</sup>Mowindo, hiyani dhabure dhaatedhene musawo dhoonyenge-tha dhaatedhene, nrima ni dhowaaba. <sup>2</sup>Mukale wona ahima a manyenya, mmurimani mweenyu murabulelege mukaka woweela wa muneba wi ni mukaka oyo munnuwege ofiyedha omavulumusiwelo, <sup>3</sup>vowi muhulawiha wi Nabwiya dapama.<sup>e</sup>

<sup>b</sup> 1.16 Moone Levitiku 11.44-45; 19.2; 20.7    <sup>c</sup> 1.23 Bewu si efwanafwaniho ya madhu a Mulugu. Moone musibe na namadhala Maruku 4.14.    <sup>d</sup> 1.25 Ezaya 40.6-9 (Bibiliya Seputuwezhintu)    <sup>e</sup> 2.3 Masaalimu 34.8

### Nibwe nigumi ni nlogo noosakuliwa

<sup>4</sup>Mmwaaddamele Nabwiya, nibwe nigumi nakooddile athu, mbwenye Mulugu nasakuliiye wona noofuneyesesa. <sup>5</sup>Teto nyo mukale wona mabwe magumi, enamagiwana nyuba mwa muneba wi mukale anamakutha oweela mirima, mveleelege mikutho mwa muneba dhinarumedhiwa ni Mulugu, odheela mwa Yesu Kirixtu. <sup>6</sup>Wona Maleba Ootaleleya enawoga, yiraga:

*“Keeng’anani, miyo ginohela nibwe noohiddeela nyuba,  
nsakuliwe, noofuneya oZiyoni,<sup>f</sup>  
ole onaroromela nibwe ndde kadha akalana manyazo”.<sup>g</sup>*

<sup>7</sup>Mwa nyo munaroromela, nibwe nddo thoofuneyesesa; mbwenye ale ehinaroromela efwaneelele yiiwe madhu ala eneera:

*“Nibwe nakooddile anamamaga nyuba,  
nddi nahidha okala nibwe noohiddeela nyuba”.<sup>h</sup>*

<sup>8</sup>Teto, ahiira: *“Nibwe nnakwakwathusa,  
teto nibwe nnaatongwihege”.<sup>i</sup>*

Athu ala ehikwakwathuwa, mwaha wi kayeewelegele mutheenga, mooligana wona Mulugu mwamaruweliye wa aliwa.

<sup>9</sup>Mbwenye nyo muli nlogo nsakuliwe, anamakutha a Omwene, nlogo noweela, nlogo naaye-naaye na Mulugu wi nlaleyege opogo wa ole wuwiithanileni mwiipipini wi mukale mowaara mwaaye mootikiniha.<sup>j</sup>

<sup>10</sup>Wale nyooovo kamwaali nlogo, mwaali athu bure mbwenye dhiinova muli nlogo na Mulugu, wale kamwaakelile thagaraga dha Mulugu, mbwenye dhiinova muhaakela thagaraga dhaaye.<sup>k</sup>

### Mweeddelo wa aKirixtu

<sup>11</sup>Akwaaga oodhivela, muubuwelegele wi nyo muli anaweendda anamadha a mwiilaboni mu, ginowuukokomezani wi: Mutadhe dhabure, dhinaanddela mwiili, dhinawana ni dhigumi dheenyu. <sup>12</sup>Mweeddelo weenyu okaleve wapama vaari va athu oode, naari yuwaabagani yiraga muli abure. Mowindo eneerege woona meerele apama mwa nyo, mmutamaalege Mulugu ofiyedha nlabo nnadhiiye.

<sup>13</sup>Mwaha wa Nabwiya, mwawiiwelegele asogoleli aatene a elabo, akala di kingi onalamula, <sup>14</sup>naari makuminadori aaye, mwawiiwelegele vowi wiire waasakula wi yawoonihege goyi eneerana dhabure, yaatamaalege otamaala eneerana dhapama. <sup>15</sup>Vowi fuufuna wa Mulugu, mweeragana dhapama, munowaamaliha athu oohunonelamo ehuwaabegeni.

<sup>f</sup> 2.6 Ziyoni naali ndina nimohi na Zheruzalemi.    <sup>g</sup> 2.6 Ezaya 28.16 (Bibiliya Seputuwazhinta)    <sup>h</sup> 2.7 Masaalimu 118.22    <sup>i</sup> 2.8 Ezaya 8.14-15    <sup>j</sup> 2.9 Moone Okuma 19.5-6; Ezaya 9.1; 43.20-21 (Bibiliya Seputuwazhinta); Deteronomiyo 4.20; 7.6; 14.2  
<sup>k</sup> 2.10 Moone Ozeya 2.23

<sup>16</sup>Mweeddege wona athu ootapuwa, kamweeddegena otapuwa wula wona yowiipitihana dhimaanya, mbwenye mukalege wona amwiimeleli<sup>l</sup> a Mulugu. <sup>17</sup>Mwaarihege athu aatene, mwaadhivelege addibilinyu murroromeloni, mmoovege Mulugu ni waariha mamwene.

### Kirixtu nifwanafwaniho na athu enarabula

<sup>18</sup>Nyoovo amwiimeleli,<sup>m</sup> mwawiiwelelege anabwiya eenyu ni nriiho naatenene, muhawiiwelelege apamave ni oopwaasa, mbwenye teto mwawiiwelelege ni alene eli oorusa. <sup>19</sup>Akalavo muthu wiipelekile wa Mulugu, vano aharahariwaga ahinna mwaha, oliye avilelaga, Mulugu onoodha amuthithimihe. <sup>20</sup>Nyo mweeragana dhabure moonihiwaga goyi, mvilelaga munaakele ddi? Mbwenye akala nyo munowiirana dhapama, moonihiwaga goyi mvilelaga, enakala yoothithimiheya vameentoni va Mulugu. <sup>21</sup>Ebaribareene nyo mwiithaneliwe dhedhi, vovi teto Kirixtu wooniheliwe goyi nyeene, ohuuhiedhani nifwanafwaniho wi muharege manyalo aaye.

<sup>22</sup>“*Oliye keerilena yoothega,*

*naari kafwanyiwena yoonyengetha muwano mwaaye*”.<sup>n</sup>

<sup>23</sup>Aruwaniwaga, kaakulile ni oruwana; arabulaga, kawoopopihe athu, mbwenye ahiipeleka wa ole onathonga mowogoowa.<sup>o</sup> <sup>24</sup>Oliye yeeka ahithukula mmwiilini mwaaye dhoothega dheehu vamuraddini wi hiyo nihiye dhoothega, nambeele mweeddelo wa egumi yooharihamo. Muhuyilihiwa ni makwadda aaye. <sup>25</sup>Nyoovo mwaali wona mabila ooholowa, mbwenye dhiinova muhuwelela wa Makambuzi oli Namaang'anela a dhigumi dheenyu.<sup>p</sup>

### Makalelo a aliba otela

**3** <sup>1</sup>Ni mukalelo mmohive, ahiyana ooteliwa mwawiiwelelege amamuni-nyu, mwaha wi oliye akala kaneewelega madhu a Mulugu, ni mukalelo wa mweeddelo wa mwihiyanaaye akwekwetheye, aromele vihili madhu, <sup>2</sup>oonaga mweeddelo wapama ni woriiheya wa nyoovo. <sup>3</sup>Oriya weenyu ohukale wowiiwomihedha odeve wona mathithi owaaluwa ni birinku dha oro, naari guwo dhooterena. <sup>4</sup>Moohiyaniha, oriya weenyu woohurimeela okale muwari mwa mirima dheenyu, onooniha muneba wofwaasa, womaala, oli wa thima elubale vameentoni va Mulugu. <sup>5</sup>Vovi dhaali ndo, ahiyana oweela mirima awale yowiiiriya, emuroromelaga Mulugu, aliwa yowawiiwelela amamuniwa, <sup>6</sup>wona Saara amwiwelela Abarhamu amwiiraga “nabwiya”. Nyoovo mweeragana dhapama muhoovaga yego, munakala ahima a Saara.<sup>q</sup>

<sup>l</sup> 2.16 Naari wi: *adhaari*. <sup>m</sup> 2.18 Naari wi: *adhaari*. <sup>n</sup> 2.22 Ezaya 53.9 <sup>o</sup> 2.23 Moone Ezaya 53.7 <sup>p</sup> 2.25 Moone Ezaya 53.5-6 (Bibiliya Seputuwazhinta). <sup>q</sup> 3.6 Moone Wambeela 18.12

<sup>7</sup>Teto nyo mutelile, mukalege ni ahiyaniinyu moononelamo. Mwaavahege nriho, vowi mukalelo weewa boolodhowa okwaranya weenyu, aliwa enowaakela vamohi ni nyo mwa mahala egumi yoohu-mala. Mwiiregena dhedho wi malobelo eenyu ehifugeleye.

### Makalelo a aKirixtu

<sup>8</sup>Voomariha nyo mwaatene mukalena moobuwelo mamohive, mukuru-muwelanenge, mudhivelanenge mmohi ni mukwaaye, mukale oweeddiwelana thagaraga ni owiiveyiha. <sup>9</sup>Onowiirelani yabure kammuwelihedhe yabure, naari ooruwani, moohiyaniha, mwaalobelegege aliwa mareliho, vowi bumwahaya Mulugu wuwiithaneliyeeni wi mwaakele mareliho a mvahi woohiyedhiwa. <sup>10</sup>Sowi Maleba Ootaleleya ehiwoga, yiiraga:

*“Ole onafuna odhivela egumi yaaye ni okalana malabo a murenddele, ahiye owoga dhabure naari ahirathege;*

<sup>11</sup>*arabelege dhabure vano eeregena dhapama; asayelegeve murenddele, aharege murenddele oyo.*

<sup>12</sup>*Vowi meento a Nabwiya enawaang'ana athu ovirihamo, mabaruu aaye enavuruwana malobelo eewa, mbwenye kove ya Nabwiya enotakaleliwa ni ale eneerana dhabure”.*<sup>r</sup>

### Orabula mwaha wa omuhara Yesu

<sup>13</sup>Nyo munowiirana dhapama, ki baani onowiireleni dhabure? <sup>14</sup>Mbwenye, naari murabulaga mwaha wowiirana dhapama, muli oreelihiwa. Kamoove dhowoopopiha dheewa naari kamukukumuwe, <sup>15</sup>vowambeela, mmuthithimihe Kirixtu wona Nabwiya mmirimani mweenyu, mukalege owiisasanyedheene wi mmwaakule kadda muthu onookohani wi mwawaaddele ojejiha winniinyuna. <sup>16</sup>Mwa dhaatedhene, mwiiregena dhedho ni wiiyeviha, nriho ni murima wapama wi ale enawoga obure wa nyo, mwaha wa meeddelo eenyu apama oomuroromela Kirixtu, ekalegena manyazo. <sup>17</sup>Mwaha wi ndo sapama muthu woona goyi, yakala efunelo ya Mulugu, ohiya orabula mwaha wowiirana dhabure. <sup>18</sup>Vowi teto Kirixtu okwile dila emohi wi alivele dhoothega dheehu. Oliye ahirabula epaddi ya anamathega agali owogoowa ahinna yoothega, afunaga wuudha-naani wa Mulugu. Oliye akwile mwa mwiili, mbwenye ahivenyihiwa mwa muneba. <sup>19</sup>Vano mmunebani ahidhowa olaleya wa mineba dhafugeliwe mukaambura, <sup>20</sup>Nda dhaali mineba dha ale yahamwiiwelele Mulugu. Oliye vajejihiye ni ovilela mwa malabo a Nowe vasasanyiiye mwanddeya. Athu ooyeva yaali mwemo, atanu ni araaru bavuluwe odheela mwa mahinje.<sup>s</sup> <sup>21</sup>Mahinje ale, yaali etoonyihedho ya obathizo, dhiinova teto enowuuvu-

<sup>r</sup> 3.12 Masaalimu 34.12-16 (Bibiliya Seputuwazhinta)    <sup>s</sup> 3.20 Moone Wambeela 6.1 ofiyedha 7.24

lumusani, obathizo ola kahuwo woohuwa yootakala ya mwiili, mbwenye fuumuloba Mulugu wiiraga: “Kamwiirena, mugivahe moobuwelo apama”. Nnowaanda oloba nda mwaha wa ovenyihwa wa Yesu Kirixtu, <sup>22</sup>oyene odhowile odhulu oli omoononi wooja wa Mulugu, onaalumuliiye angero, dha othongi ni dha owodha.

### Egumi exa

**4** <sup>1</sup>Mowindo, wona Kirixtu arabulile mmwiilini, nyoovo teto mwiisa-sanyedhe ni moobuwelelo ayene wona oliye dheeriliye: wi ole onoono goyi mmwiilini ohuhiya yoothega. <sup>2</sup>Mudhidhi onahaliyena, ahikaleve mwa dhidhivi-dhivi dha emuthu, mbwenye, akalege mwa ofuna wa Mulugu. <sup>3</sup>Nyo muhumala onoonga mudhidhi mujinji musasanyaga dhinaadhiwela ale ehimunonile Mulugu. Mudhidhi olene nyo mweedde-la, dhoofuna mwiili, mwa dhikwaminigwa, mmang'welo, moolezela, ofiyedha waweebedha amilugu oosemiwa ooweeddiha murima. <sup>4</sup>Vano oode enowuunyemulani, mwaahikalaga vamohi ni aliwa mwa meeddelo eewa abure enathamaga wona mwihinje, bumwahaya enooruwaneliisuni. <sup>5</sup>Osogoro aliwa enoodha yiisorihe vameentoni va Mulugu, wiisasanyedhe wi aathonge ookalawo ni ookwa. <sup>6</sup>Mwahaya buuyene, mutheenga ohulalelyeliwa teto ni anookweene, ethongiwe mwa mwiili wona athu aatene, mbwenye mwa muneba eneerege okalawoove wona Mulugu.

### AKirixtu ehiddihe mabasa mvahi dha Mulugu

<sup>7</sup>Omagomelo wa dhego dhaatedhene ohaaddamela. Kalani oo-waraala mururumuwe wi mwaandege olobela. <sup>8</sup>Yoofuneyesesa sowi mudhivelanenge mookwaranya mmohi ni mukwaaye, mwaha wi odhivela onokuneela wiinjiva wa dhoothega. <sup>t</sup> <sup>9</sup>Mwaakelanenge mmohi ni mukwaaye wona aleddo mmavade mweenyu mwihiiikubanyedhaga. <sup>10</sup>Mulugu ohukanna mvahi dhoohiyana-hiyana, dhimvahiliye kadda muthu mwa mahala. Niimelelane mmohi ni mukwaaye wona amusadoro apama. <sup>11</sup>Ole onalaleya, alaleyege madhu odheela wa Mulugu; oneemelele eemelele ni kopolo dhinamvaha Mulugu. Mwiiregena ndo wi mwa dhaatedhene Mulugu athithimihiwege odheela mwa Yesu Kirixtu, mwiinya a nthithimiho ni kopolo dha okala ni okala! Amen!<sup>u</sup>

### Wona dhoovoreya mwaha wookala muKirixtu

<sup>12</sup>Akwaaga oodhivela, kamututuwe munddo woweha onadha vaari va nyo wi wuweeheni, ehikale wona yego ehinoopadduwelegeni. <sup>13</sup>Moohiyaniha, muhagalalege vowi muli mu dhoovoreya dhimohive ni Kirixtu

<sup>t</sup> 4.8 Moone Poroveribiyo 10.12    <sup>u</sup> 4.11 Amen! enatapulela *Dhikale ndo*, naari wi *Siibaribareene*.

wi mudhaaleliwe othaba ni ohagalala nooneyihiwa nthithimiho naaye.

<sup>14</sup>Mwaaruwaniwaga mwaha woomuhara Kirixtu, munaakale oorelihiwa, vovi eyo enooniha wi Muneba woothithimiheya wa Mulugu oli mwa nyo.

<sup>15</sup>Ahikalevo mmohi mwa nyo onarabulihewege mwaha wa okala namapa, wowiia, woobure, naari wa ovolowela dhigumi dha athu amohi. <sup>16</sup>Moohiyaniha, arabulihwaga mwaha wookala muKirixtu, ahikalegena manyazo, mbwenye amutamaalege Mulugu mwaha wi wiithaniwana ndina nddo.

<sup>17</sup>Sowi mudhidhi wowambeela othongiwa ohufiya, ale eli epaddi ya nlogo na Mulugu binakala owambeela othongiwa. Akala othongiwa wula onambeela ni hiyo, ki omagomelo wa athu ale ehinewelela Muselu Wapama wa Mulugu enaakale addi? <sup>18</sup>Wona munawogela Maleba Ootaleleya, yiiraga: “Akala dhinorusa ovulumusiwa owogoowa, ki ehinamuriha Mulugu ni anamathaga eneeriwena avi?” <sup>19</sup>Mowindo ale enarabulihwiwa mwaha wa ofuna wa Mulugu, enoofuneya yeepelekege mmadani mwa Mpaddusi eewa, onaakwaneliha dhoororomeliha dhaaye, aliwa edhowegenaave wiirana dhapama.

#### Olagiwa wa asogoleli ni wa azombwe

**5** <sup>1</sup>Mowindala ginowaakokomezwa asogoleli a mwa nyoovo, vovi teto miyo gili musogoleli, gili namoona a goyi ya Kirixtu, vano ginokala epaddi ya nthithimiho nnooneyihiwe: <sup>2</sup>kameelani nikuru na mabila Mulugu nuvahiliyeni. Mmwaang'ane oliye, mwihiraga owaddihediwa, mbwenye ni murima wootapuwa wona Mulugu munafuneliye. Kamulabege wi muthambilege korowa, mbwenye ni ebaribari yoofuna wiimelela. <sup>3</sup>Kamusayeke wiikaliha anya a athu muhiyedhiwiinyu, mbwenye mukale yoofwanafwaniha ya nikwedda na mabila. <sup>4</sup>Vano Makambuzi Mulubale adha, nyo munowaakela kara ya nthithimiho ehinahiya ozherimela.

<sup>5</sup>Nyo azombwe, mwawiiwelelege makolo. Mwaatene mukameelanenge mowiiyeviha mmohi ni mukwaaye, mwaha wi “Mulugu onowawiiinyuwelela owiithukulela, mbwenye onaavaha mahala owiiyeviha”. <sup>6</sup>Mowindo, mwiyevihe vati va madada a kopolo a Mulugu wi oliye owunnuwiheni mudhidhi ofuniliye. <sup>7</sup>Opeleke makathamihho aawo maatene wa Mulugu, mwaha wi oliye dinookameelani. <sup>8</sup>Mukale oorurumuweene mwiying'anelaga. Sathana<sup>x</sup> mwiiddani eenyu, onowuwapelelani wona poddogoma, anddaga amusayelaga oomutakuna. <sup>9</sup>Mukalena nrromelo mulibe mumvaanye oliye<sup>y</sup> munonaga wi addibila yinniinyuna mwiilaboni mwaatemwene ehikanna goyi yankeene enooniinyu.

<sup>10</sup>Vano Mulugu a mahala maatene, wuwiihaneleni nthithimiho naaye na mukala-kala mwa Yesu Kirixtu, nuwindo mugarabulile mudhidhi vang'ono, oliye onowuwelihedhamoni, onowuwaraalihani, onowuulibi-

▼ 4.18 Poroveribiyo 11.31 (Bibiliya Seputuwazhinta)    w 5.5 Poroveribiyo 3.34 (Bibiliya Seputuwazhinta)    x 5.8 Naari wi: *Ddiyabo*.    y 5.9 Moone Luka 4.1-13



hani ni wuuvahani matibelelo ooliba. <sup>11</sup>Mwa oliye mukale owodha wa okala ni okala. Ameni.

### Malojelo oogomihedha

<sup>12</sup>Ginowuulebelani kaarata eng'onong'ono ela ni okamihedhiwa wa Silivano,<sup>z</sup> ginamwiira ddibilaaga oororomeleya. Ginafunu guulibiheni, ola bu onamoona ginowiireliimini wi ala bi mahala a ebaribari a Mulugu. Kalani olibeene mwa mahala a Mulugu.

<sup>13</sup>Gerezha eli oBabilooniya,<sup>a</sup> eli yoosakuliwa ni Mulugu, eno-wuurumihedhani malojelo. Teto Maruku,<sup>b</sup> mwaanaga onowuulojelani. <sup>14</sup>Mulojelane mmohi ni mukwaaye ni bezhu ya odhivelana wa eKirixtu. Murenddele wa nyoovo mwaatene muli mwa Kirixtu.

---

<sup>z</sup> 5.12 Ndina nowi Sila mu ewogelo ya eLati. Moone Meerelo a Arumiwi 15.22,40.   <sup>a</sup> 5.13 Ajinji ebaribareene ndina na etoonyihedho ya oRoma.   <sup>b</sup> 5.13 Moone Meerelo a Arumiwi 12.2,25; 13.13; 15.37-39; AKolose 4.10; Filimoni 24